



61 217

QUÆSTIO MEDICA,

QUODLIBETARIIS DISPUTATIONIBUS
manè discutienda in Scholis Medicorum, die Jovis
decimâ-septimâ Novembris.

M. FRANCISCO LE RAT, Doctore
Medico, Præside.

*An humorum morbifica Dissolutio, & Concretio, semper
ab acidô?*

I.

CAUSAS morificas ad unum vel duo capita revocare, sejunior & compendiosior medicina est. Aliàs periti ac imperiti res ægrorum perindè tractarent, hosque fors eadem maneret; neque ullus esset observationum, & curiosæ rerum investigationis fructus. Si jure olim rejecta est celebris illa calidi, frigidi, sicci, & humidii hypothesis, quâ se ratione tueatur hodierna & vulgaris, quæ præter acidum & alcali agnoscit nihil? Absit ut ea sint prima rerum principia, quorum quæ circumferuntur definitiones, nihil aliud offerunt, quàm partes acutas & porosas sese invicem excipientes: impares profectò quæ ceteras materiæ figuras, alioquin innumeras, earumque vires & proprietates complectantur. An ab acidô & alcali, aut eorum alterutrò, lumen hoc, quò fruimur & cujus momentanea in hunc orbem diffusio? Quæ ejus reflectio & refractio fieri & explicari possint; cum ubique oblongis illis & acutis corpusculis obviæ sint aliæ particulæ asperæ & porosæ, quas illa faciliè subeunt, quibusque tota absorbentur? Quæ stabit perennis sanguinis motus? Quæ grati ac suaves excitentur, cum odores, tum sapes? Certè materia ætherea & subtilis, quæ aëri supernatat, & ex quâ formantur

astra & cometæ, aliam ab acidô & alcali originem habet; * quæ quid aliud sunt, quàm moles per se otiosa ac iners, unius terræ factus. Coctionem, fermentationem, præcipitationem, aliundè derivari, quàm ex acidî & alcali occurſu, acidâ cum acidis, alcalia cum alcalibus, sulphurea cum sulphureis, fermentescentia satis superque evincunt. Ad fermentationem id unum requiritur, ut quæ miscentur corpora sese invicem excipiant: istô enim novi corporis in aliud ingressu, materia ætherea, à quâ omnis motus, angustioribus coercita locis, hûc & illûc impetu factô erumpit. Nequè magis appositè acidum & alcali sola mixtorum elementa statueris. Longè plures sunt aliæ ab iis facultates, & ad tuendam, destruendamve sanitatem vires. Æquè peccant qui humorum morbificam dissolutionem ab alcali, concretionem ab acidô, aut utrumque morbi genus à solô acidô volatili vel fixô deducunt; à volatili quidè febres causodes, erysipelata, pleuritides, anginas &c. à fixô calculum, catalepsi, strumas, &c.

II.

QUANDI U sanguis, cœterique humores, jugi & laudabili cientur motu, mixtique & aptè inter se contemperati sunt; tunc valet, efflorescitque corpus univèrsu. At ubi perenni illorum motui quid vitii accedit, aut ex his aliquis sui quasi juris factus reliquis præpollet, eorum vel dissolutio, vel concretio, præcipua morborum genera, subnascantur necesse est. Utriûsque non una sed multiplex differentia: alia repentè fit, alia gradatim, quædam ab immodicô æstu seu fermentatione, quædam ab animalium venenatorum morsu; quædam ex malignô aëris miasmate procedit. Nullam vel serosâ colluviei, vel obstructionis, vel tumorum speciem reperire est, quæ ad concretionem, dissolutionemve referenda non sit. Utramque uni putredini nè attribuas. Alii sunt ab eâ concretionis & dissolutionis fontes. An à putredine ortum ducunt quæ de subito fiunt? an quæ fermentationem sequuntur, quæque ab ictu viperæ catervatim irruunt symptomata, ea putredini omnia imputaris? Ipsamet febris, quam putridam vocant, interdum sinè putredine est, quemadmodum sinè febre nonnullas observabis putredines. Hujusce rei fidem faciunt lues venerea, scorbutus, quæ vitia semper putredo, rarò febris, comitatur. Quan-

diù suis in vasis continetur sanguis, putredine tentatur nunquam. Nec objicias tubercula seu pustulas quas variolas nominant, sanguinis è venâ sectâ emissi pravos colores, vermesque è vasis cum sanguine interdum erumpentes. Primò sub casu putredinem non contrahit sanguis, nisi in cutem subjectasve partes effusus: in alterò degeneres & pravi illius colores non putredinem, sed vel extraneos humores admixtos, vel effluxus modum, vel aëris plures, paucioresque, quibus perflatus est, particulas, sui causas agnoscunt. Sub ultimò tandem vermiculi in sanguine nascuntur, sed semina sunt cum potu cibisve, vel aëre, sanguinem ingressa, quorum particulae evolutae explicataeque sensim molem acquirunt, & exinconspicuis evidentes fiunt. Quantò melius febres, morbosque alios reposueris in vitiosa quâdam dispositione seu texturâ humorum, qui mole ut plurimum minimi, vi contra maximi, & summè actuosi, fermenti instar sese propagant, diffunduntque in vicinos. Vim hanc faciliè intellexeris, si specificorum remediorum naturam, ipsorumque vires sedulo exploraris. Cortex Peruvianus, Pulvis Marchionis cum Cinnabari Antimonii, Scrophularia, Ipecacuanha, habent à solâ suâ texturâ, fermenti moribifici texturâ contrariâ, quòd ille febres intermittentes, alter Epilepsiam, tertia hæmorrhoidas dolentes, quarta denique dysentericos affectus, sanent: nisi malueris, humoribus morbificis, eorumque specificis simul coeuntibus (è quorum mixtione novæ texturæ concretum emergit) ejusmodi curationes referre acceptas.

III.

HUMANUM corpus alimentis potissimum immutatur, & aëre. Aër & alimenta variis constant moleculis, quarum alia acidæ, alia amaræ, alia acerbæ, & austerae, alia dulces, & insipidae &c. Jam verò cur penes solas acidas, reliquis sopitis & otiosis, vis & dominii juserit? cur solæ, depressis aliis, eminebunt? cur illæ tantum texturam morbificam fermenti æmulam, proximam morborum causam, humoribus inducent? an quod suò, nos ambiens aër æstivus, calore, spirituosam sanguinis substantiam exhaurit; aut hybernus, frigore, frigidisque atomis de novò inductis majorem humoribus nostris acidi copiam subministrat? Exhaurit quidè aër æstivus quod tenue &

subtile est; sed prius tamèn quàm ità dissiparit, ut acidum summâ rerum potiatur, quod amarum æstuosumque est, acuat & evehat necessum est: Undè & vigente æstate morbos à bile furentes ut plurimum grassari videmus. Similiter qui vernò tempore affligant morbi, an ab absumptis spiritibus, an ab acidis in dies succrescentibus proveniunt? Vernus aër tùm ob radios solis nequè obliquiores nequè directiores, tùm ob gratos odores è floribus expirantes, quibus locupletatur, spiritus non solum recreat & reficit, sed etiàm naturâ renascente acidum vim obtundit & frangit. Illiûs beneficiò morbi chronici, febresque etiàm quartanæ autumnales & hyemales, nullis antea remediis superabiles, sensim evanescunt. Hinc angina, pleuritidis, peripneumoniæ cæterorumque vernalium morborum generatio aliundè quàm ab acidò deducenda. Sux sunt certè aliis ab acidò facultatibus amaris, dulcibus aliisque idgenus ad nocendum vires, si exuperent sesequè à reliquarum complexu expediant. Sensus fortasse non adeò acriter ferient earum aliquæ, sed non capropter minùs pertimescendæ, quas idcirco ad τὸ θείον veteres retulere. Si ab aëris calore frigoreve acidum vis aut copia augeatur, cur sub iisdem constitutionibus, similibusque penès calorem & frigus annis, non iidem semper morbi? cur interdum contrà defæviunt? Ut morbi non semper respondent anni tempestatibus; ità ex aëris calore vel frigore non omnino æstimanda est illorum natura. Præterquàm quòd pessima quandòque sanguini inuritur labes à nonnullis corpusculis è terræ visceribus prodeuntibus, quæ nullatenùs afficiunt sensus. Diverse sunt caloris & frigoris species, quæ ut à variis emergunt fontibus, ità planè dissidentes edunt affectus; aliis enim calor, aliud frigus quod solis sequitur motum, multumque discrepans ab eò, quod à ventis & quibusdam terræ exhalationibus procedit. Qui initio peripneumoniæ hyemalis, emetica commendat, frustra perhibet non alios hyeme, quàm crudos & acidos generari, humores.

IV.

AGE verò quod ex febrifugis petitur argumentum, an validiori ratione fulcitur? amara sint illa, an idèò morborum, ac maximè febrium omnium, causa est acidum? Id si ità est, Aloe, Centaurium minus, Fumaria, Scordium aliæque idgenus summè amara, ad fugandas febres cortici Peruviano antea-

ponas oportet, quibus amaritudine plurimum cedit, & stypticâ insuper qualitate cum donetur, acidi particeps haberi debet. Sed & amara an alkalina omnia naturæ? an sola febrifuga? nunquid & acidis quibusdam vis illa febrium domitrix inest? nunquid & aliis quæ & acidis amarisque particulis constant? Febrium non una materia est. Sæpius à bile ortum ducunt: hanc testantur sitis, oris amaritudo, diarrhæa biliosa, pulsus vehemens & magnus, calor acer, animi anxietas, jactatio corporis, delirium & cætera febrium symptomata, quæ salium volatilem quibus bilis turget, characterem præferunt. Nugantur qui hos inter tumultus bilem otiosam jacere & passivè sese habere, in animum inducunt suum. Frustrâ oggeris cum ex acidis, aliquis in febribus percipitur fructus, febres illas à certò quòdam & sui generis acidò, natas, cui oblatum remediū locò acidum nomine tantum consentiat, reverà autem adversetur, atque hoc, respectu illius, gerere alcali vices. Quamvis varia sint acidi discrimina, non ità tamen alterum ab alterò distat, ut perseverante acidi naturâ, alkalinam simul obtineat. Sed hoc datò, quò morborum causas internoscas? quò propria unicuique affectui remedia aptabis? An ex saporibus? At iis fidem demit, qui acida quædam inter alcali recenset. Præterea si intermittentium continuarumque febrium parens est humor acidus, cur horror rigore ineunte illarum accessione ut plurimum, inchoantibus autem harum exacerbationibus rarissimè, deprehenditur? si reponas acidum in febribus continuis esse volatile, in intermittentibus fixum, dic amabo, quò hoc accenditur & intrà unam horam fit volatile & febrem facit? cur ex adversò idem acidum fixum, quod cachexiam, scorbutum, hydropem, aliosque contumaces affectus, sæpius febris expertes, producit, non accendatur, neque volatile fiat, febrium author eò nomine futurum? Non felicior ad medendum hæc hypothesis. Innumeræ sunt acidorum species, suis unaquæque propriis & aptis oppugnanda remediis. Hanc autem assequi aptitudinem non tam artis quam fortunæ munus. Res planè dubia est & plena periculi, maximè quod ea sit plerorumque alcalium indoles, ut in eorum usu non impunè peccetur, humores sopitos excitant, motos exasperant, & sæpè novos generant. Deinde illæ acidorum species, licet innumeræ, nec pares sunt singulis causis morbificis penitus comprehendenda.

dis. Hypochondriaca affectio non ab unô syncerôque acidô, sed ex pluribus ac planè diversis etiam penès genus substantiis, derivatur. Causa illiùs parens, humor est non absimilis sali ammoniacô ex tribus substantiis omninô dissidentibus conflât, sale scilicet communi quod acidum est, salibus volatilibus urinæ quæ alcalia dicuntur, & fuligine, mixtô corpore. Cave itaque si salia exhibueris volatilia ad ructus acidos huic morbo familiares, ne pars acris quæ acidô vineta est, tunc libera & juris sui efferetur, atque ægrotantis caput tentet, uti non semel contingit; hæud secùs ac in sale ammoniacô, spiritus urinæ quandiù sunt acido impliciti, stant quieti; admixtô verò sale tartari, aut calce, ab invicem soluti statim incandescunt. Ut magis candidè, sic securiùs, se gerunt, qui fatentur ingenuè sibi non perspectas singulas rerum species, & conversô animô, ad id, quô communis omnium morborum natura continetur, medendi methodum simul instituant, quæ singulis convenire queat fermentationibus; vel si specificis uti necessitas cogat, ea seligunt quæ leviorè in cruore pariunt tumultum; & si quandò res redactæ sunt ad angustias, periclitantur quidè, sed circumspèctè & sapienter, videlicet exemplis ducti longo usu comprobatis, documentisque naturæ fidelibus, non verò audendi legibus, & pœnæ subductâ fiduciâ.

V.

QUAMLIBET concretionem morbificam soliùs acidis sobolem esse, chymistarum commentum. Id quidè vi donatur coagulandi, sed per accidens, ubi nimirum partes nanciscitur fibrosas & ramosas, ut in lacte & sanguine, aliàs solvit & dividit mixtorum compagem. Si ejus figuram spectes, acuta cum supponatur, ad divisionem potiùs apta nata esse videtur, quàm ad coagulationem. Sagitta vibrata in lanam vel aliud simile corpus ramosum eam non solvit, sed magis ac magis implicat; an idcirco ad divisionem minùs à naturâ comparata est? Perperàm clamitant nonnulli salia concreescere; an singula sunt è genere acidorum, & sola hæc densantur? salia alcalia rùm volatilia, rùm fixa perindè concreescunt ac acida. Corallustorô genere acidis insensus mediis in aquis lapidescit: nec quodlibet serum è specûum fornicibus depluens, ex quo efformantur columnæ, nec quælibet aquæ fontium, quibus, quæ immerguntur etiam ligna, in lapidem vertuntur, sapore sunt acida.

Si quæ dantur acida, videlicet alumen, oleum vitrioli, spiritus sulphuris &c. quæ sanguinem coagulant, extant & alia, nitrum nempe, sal commune, sal gemmæ quæ eundem à coagulò præservant. Spiritus quidam nitri acidus non ignis torturâ, sed soliû sulphuris interventu paratus, sudores potentissimè mover.

* Flores cynaræ sylvestris latifoliæ, qui subamarum sapiunt, sanguinem perindè, ac lac cogunt & densant. Quid plura? Abundè eòdemque acidò, prò diversâ parte affectâ, solutio & coagulatio producuntur. Luis venereæ virus, quod acidum vocant, si carnes, prostates, ulcera, inflammationes; si ossa, nodos; si inguina, bubonas; si extremas pudendorum partes, cancrofa ulcera; si denique habitum corporis impetit, pustulas singulâ ac diversò caractere donatas infert. Similiter salia fixa & volatilia, quæ alkalia habentur, ad solutionem & divisionem potiùs nata, quàm ad concretionem. Si in partes ramosas impingant, qualia sunt sulphurea corpora, in unum coguntur & concrescunt, uti ex sapone palàm est, & ex illâ concretionis specie quæ fit ex spiritu urinosò salis ammoniaci cùm spiritu vini defæcatissimò. Porro concretio sæpiùs pendet ex subiecti aptitudine, quàm ex causæ efficientis naturâ: hæc promiscuè fit ab acidis, ab alkalibus, aliisque corporibus omninò discrepantibus. Certè naturam spiritûs vini, ut cæterorum sulphureorum corporum, minùs perspectam habet qui acida illa esse profitetur. ^b Ex spiritûs vini distillatione ad libram unam, solummodò elicitur salis volatilis drachma semis, residuum verò, liquor est planè insipidus. Spiritus sulphurei quid sunt quàm quid medium aquam inter & olea? Ex oleis æthereis salia volatilia nullò negotiò eruuntur quamprimùm suis vinculis soluta scilicet viscosâ & resinosâ materiâ. Si oleo anisi vel fœniculi spiritum vitrioli affundas, non levis exoritur ebullitio. Iniquè etiam olea per expressiorem acida appellantur, utpotè quæ quamplurima sint acria. Ridiculum sanè quod afferunt ex oleo olivarum, cupro affusò, vitriolum evocari. Aqua simplex & spiritus urinosus salis ammoniaci acidis insensibilissimus, idem multòque citiùs præstant. Sulphur quidem commune acidum est, non quatenùs sulphur, sed quatenùs est concretum ex sale vitriolatò, & ex sulphure. ^c Subfannandi profectò sunt, qui ex prædicâ mixturâ spiritûs vini cum spiritu urinosò salis ammoniaci in quandam

^a Scolymus
Dioscori-
dis.

^b Arrago-
sius ad Cra-
tonè epist.
ss. p. 73.

^c Martinius
de urinæ
anacem. c.
149. p. 251.

■ Helmon-
rius de li-
thiasi. c.
3^o. & 4^o.

concretionis speciem desinente, acriter pronuntiant, catalepsim;
(quæ spirituum animalium coagulatio dicitur) fieri ex simili oc-
cursu spirituum acidorum & alkalium ; * hincque calculi genera-
tionem deducunt. Multo magis culpandi sunt, qui ubi aliquod
concretionis genus obvium est, illico ad alkalia confugiunt,
fallacibus plenisque periculi delusi exemplis. Ex effectibus æqui-
vocis, cujusmodi sunt humorum solutio & concretio, neque
causæ morborum internoscuntur, neque agendorum remedio-
rumque indicatio aptè elicitur.

*Ergo humorum morbifica Dissolutio, & Concretio, non semper
ab acidô.*

Domini Doctores Disputaturi.

M. Franciscus le Rat, Præses.

M. Josephus Thomasseau.

M. Mathaus Thuillier.

M. Ludovicus Labbé, Aca-
demie Censor.

M. Ludovicus Poirier.

M. Carolus Marteau.

M. Andreas Enguehard, Pro-
fessor Regius.

M. Petrus Bonnet Bourdelot,
Medicus Regis, perpetuo ord.

M. Antonius le Moine.

Proponebat Lutetiæ GILBERTUS PUYLON, Parisinus Baccalaureus
Medicus. A. R. S. H. 1695.

Apud Franciscum Muguet, Regis & Facultatis Medicinæ Typographum.